

BESTELAKO XEDAPENAK

OSASUN SAILA

2796

AGINDUA, 2014ko ekainaren 17koa, Osasuneko sailburuarena, 2014ko ekitaldian talde teknikoak mantentzeko, adikzioen prebentzio komunitarioko programak garatzeko eta arriskuak eta kalteak prebenitu eta gutxitzeko proiektuak egiteko laguntza ekonomikoetarako deialdia egiten duena.

Abenduaren 15eko 20/2012 Dekretuak, Lehendakariarenak, Euskal Autonomia Erkidegoaren Administrazio sailak sortu, ezabatu eta aldatzen dituenak eta horien egitekoak eta jardun-arloak finkatzen dituenak, 12.1 artikuluan ezarri duenaren ildotik, jardun-arlo hauek, besteak beste, dagozkio Osasun Sailari: osasun publikoa eta drogamenpekotasunak.

Agindu honek 2014ko ekitaldirako jarraipena ematen die adikzioen alorrean ohiko izan diren lerroei, hau da, talde teknikoak mantentzeko, adikzioen prebentzio komunitarioko programak garatzeko eta arriskuak eta kalteak prebenitu eta gutxitzeko proiektuak egiteko laguntzei. Ildo horretatik, Drogamendekotasunen arloko prebentzio, laguntza eta gizarteratzeari buruzko ekainaren 25eko 18/1998 Legeak 4. artikuluko 3. paragrafoan ezartzen du Autonomia Erkidegoko Administrazio Orokorra udalekin beharrezko lankidetzaren harremanak egingo dituela drogamendekotasunen prebentzio komunitariorako jarduerak garatzeko; lege beraren 43. eta 45. artikuluek, berriz, hauxe jasotzen dute: erakunde publikoek erakunde eta entitate publikoei diru-laguntzak emateko aukera. Aurrekoaz gain, Euskal Autonomia Erkidegoko Mendekotasunen VI. Plana (2011-2015) dugu ardatz nagusi diru-laguntzaren xedeko jarduketek errespetatu beharreko ildo estrategiko eta ekin-tzetarako.

Agindu honek badu 2014ko ekitaldirako berrikuntza garrantzizkorik; lehenik eta behin, kanpoan geratu da jarduera fisikoa sustatzeko programak garatzeko laguntza-lerroa, beste deialdi baten xede izango baita Osasunerako Sustapen eta Hezkuntzarako Berrikuntza-programen esparruan.

Bigarrenik, laguntzen kudeaketa arrazionalizatzeko aldera, beren-beregi utzi dira kanpoan hauek: GIB/hiesaren arriskuak eta kalteak prebenitu, kontrolatu edota gutxitzea xede duten proiektuak; GIB/hiesa duten pertsonentzako proiektuak, eta kalteak prebenitu, kontrolatu edota gutxitzekoak, xedetzat hartuta arrisku txikiagoko kontsumorako materiala ematea (xiringen trukea). Izan ere, dagokien deialdira bildu beharko dira horiek guztiak.

Gainera, beste berrikuntza batzuk ere sartu dira, proiektuen kalitatea eta kudeaketa hobetzeko: gehieneko ponderazioa gutxitu zaie lehiaketa-teknikaren bitartez ematen diren laguntza-lerroen balorazio-irizpideei, gehiegizko puntuazioa dutela iritzi baitzaie (orain atera daitekeen gehieneko puntuazioa 100 puntu da, eta irizpide bakoitzaren puntuazioa murriztu da, irizpide bakoitzak puntuazio orokorrean lehen zuen proportzioa errespetatuta); gainera, III. eta IV. kapituluetakoa laguntzen hartzaileen «arrisku-maila»ri dagokion balorazio-irizpidean, bereziki baloratzeko modukotzat hartu dira adin txikikoen artean alkoholaren kontsumoa prebenitzeko programak eta proiektuak, adin txikikoen substantzia horrekiko berebiziko kalteberatasuna dutela iritzi; eta, beste alde batetik, deialdian parte hartuko duten erakunde eskatzaileen kopurua gehitzeko asmoz, proiektu bakoitzak IV. kapituluako laguntza-lerroan jaso dezakeen gehieneko diru-laguntzak ezingo du gainditu kapituluari esleitutako diru guztiaren % 7a.

Azkenik, beren-beregi aurreikusi da III. eta IV. kapituluetakoko laguntzei uko egiteetatik ateratako zenbatekoa beste erakunde eskatzaile batzuei ematea, balorazio-batzordeak emandako puntua-zioaren arabera.

Aginduak aurreikusi duenez, erakunde interesdunek teknika telematikoak erabil ditzakete, eta prozedura izapidetzeko ere balia daitezke, arau hauek babes hartuta: otsailaren 21eko 21/2012 Dekretua, administrazio elektronikoari buruzkoa; abenduaren 19ko 59/2003 Legea, sinadura elektronikoari buruzkoa (abenduaren 28ko 56/2007 Legeak, informazioaren gizarteari bultzada emateko neurriei buruzkoak, aldatu zuen hori); ekainaren 22ko 11/2007 Legea, herritarrak zerbitzu publikoetara bitarteko elektronikoz sartzeari buruzkoa, eta hori garatzen duen azaroaren 6ko 1671/2009 Errege Dekretua; apirilaren 29ko 72/2008 Dekretua, Euskal Autonomia Erkidegoko Administrazio Orokorraren eta bere erakunde autonomiadunen erregistroen sorrera, antolaketa eta funtzionamenduari buruzkoa; 2006ko otsailaren 9ko Ebazpena, Informatika eta Telekomunikazio zuzendariarena, PLATEA e-administrazioarako plataforma teknologikoa ezartzen duen dokumentua onartzen duena.

Azkenik, deialdi hau ondo egokitzen zaio Euskal Autonomia Erkidegoko Ogasun Nagusiaren antolarauei buruzko Legearen testu bategina onartu zuen azaroaren 11ko 1/1997 Legegintza-Dekretuaren VI. tituluak ezarritakoari.

Horregatik, Euskal Autonomia Erkidegoko 2014. urteko Aurrekontu Orokorrak onartu zituen abenduaren 20ko 4/2013 Legea onartuta dagoenez gero,

Horiek horrela,

EBAZTEN DUT:

I. KAPITULUA

XEDAPEN ERKIDEAK

1. artikulua.– Xedea.

Agindu honen xedea da 2014. urtean emango diren diru-laguntzetarako deialdia egitea, osasun publikoaren eta adikzioen eremurako. Laguntza horiek, hain zuzen ere, adikzioen prebentziorako udal-taldeak mantentzeko, adikzioen prebentzio komunitariorako udal programa espezifikoak garatzeko eta arrisku eta kalteak prebenitzeko eta gutxitzeko proiektuak egiteko emango dira.

Hauek dira Agindu honen bidez lortu nahi diren helburu orokorrak:

– Adikzioen Euskal Autonomia Erkidegoko VI. Planaren jarduera-ildoetan hobekien sustraitutako programei eta proiektuei eustea. Plan hori 2012ko apirilaren 4an onartu zuen Eusko Legebiltzarra.

– Behar berriak azaltzea eta, behar horiek kontuan hartuta, horiei erantzungo dieten proiektu berriak bultzatzea.

– Proiektuak eta programak hobetzen laguntzea eta, horretarako, esku hartzeko protokoloen diseinu- eta sistematizazio-prozedurei jarraitzea.

2. artikulua.– Beste diru-laguntza edo laguntza batzuekiko bateragarritasuna.

1.– Agindu honen bidez araututako diru-laguntzak ematea bateragarria da jarduera bera finantzatzeko Administrazio berak edo beste batzuek edo beste erakunde publiko zein pribatu batzuek ematen dituzten beste diru-laguntza, laguntza, diru-sarrera edo baliabide batzuk eskuratzearekin. Diru-laguntzen zenbatekoak ezin du gainditu erakunde onuradunak garatu beharreko jardueraren kostua, beste administrazio edo erakunde publiko edo pribatu batzuek emandako diru-laguntzekin edo laguntzekin batera bada ere.

2.– Aurrekoaren ondorioetarako, eskabidearekin batera, erantzukizunpeko adierazpena aurkeztu beharko da: helburu bera lortzeko bestelako finantzaketa-iturririk dagoen ala ez, eta iturri horien zenbatekoa, eta, hala badagokio, oraindik ebatzi gabe dauden diru-laguntzen eskaerena.

3.– Lorturiko laguntza eta diru-laguntza guztien baturaren guztizkoa handiagoa bada jarduerarako guztizko aurrekontua baino, eman beharreko diru-laguntzari kendu egingo zaio aurrekontua gainditzen duen soberakina.

3. artikulua.– Laguntzak elektronikoki izapidetzea.

1.– Diru-laguntza hauek izapidetzeko baliabide elektronikoak erabiltzean, arau hauek hartuko dira kontuan: ekainaren 22ko 11/2007 Legea, herritarrek zerbitzu publikoetara sarbide elektronikoa izateari buruzkoa; otsailaren 21eko 21/2012 Dekretua, Administrazio Elektronikoari buruzkoa, eta apirilaren 29ko 72/2008 Dekretua, Euskal Autonomia Erkidegoko Administrazio Orokorren eta haren erakunde autonomoen erregistroak sortzeari, antolatzeari eta funtzionatzeari buruzkoa.

2.– Laguntza hauek izapidetzeko bide elektronikoak erabiltzeko jarraibideak hemen argitaratuko dira: osasun publikoaren eta adikzioen gaietan eskumena duen organoaren egoitza elektronikoan, euskadi.net-en:

http://www.osakidetza.euskadi.net/r85-ckdrog06/eu/contenidos/ayuda_subvencion/cap2_manten_eq_tec_2014/eu_ayuda/ficha_procedimiento.html

http://www.osakidetza.euskadi.net/r85-ckdrog06/eu/contenidos/ayuda_subvencion/cap3_despr_prevencion_2014/eu_ayuda/ficha_procedimiento.html

http://www.osakidetza.euskadi.net/r85-ckdrog06/eu/contenidos/ayuda_subvencion/cap4_despr_riesgos_danos_2014/eu_ayuda/ficha_procedimiento.html

3.– Erakunde interesdunek bitarteko elektronikoz egin ahal izango dituzte eskabideak, kontsultak eta prozedura honetako izapide guztiak.

4. artikulua.– Eskabideen aurkezpena: modua eta epea.

1.– Eskariak aurkezteko epea hilabetekoa izango da, Agindu hau Euskal Herriko Agintaritzaren Aldizkarian argitaratu eta biharamunetik zenbatzen hasita.

2.– Eskariak aurrez aurre aurkez daitezke Eusko Jaurlaritzaren herritarren arretarako bulegoetan (Zuzenean) eta lurralde ordezkartzetan edo Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen 38.4 artikuluan aurreikusitako organoetan, behar bezala betetako eskabide normalizatuaren bidez. Eskabide-eredua hemen aurki daiteke: osasun publiko eta adikzio-gaietan eskumena duen organoaren egoitza elektronikoan, euskadi.net-en.

Era berean, bide elektronikoak ere erabil daitezke laguntza-eskabideak eta gainerako agiriak aurkezteko. Informazioa eta prozedura eskura izango dira osasun publikoaren eta adikzioen arloan eskumena duen erakundeak euskadi.net-en duen egoitza elektronikoan, 3. artikuluan aurreikusitako izapidetze elektronikoaren jarraibideetan azaldutako prozeduraren eta jardueren arabera.

3.– Eskabidea izapidetzeko eta agiriak aurkezteko bide bat edo bestea erabiltzeak, hau da, aurrez aurrekoa edo elektronikoa erabiltzeak, ez du esan nahi aurrerantzean ere prozeduraren gainerako izapideak egiteko bide bera erabili behar denik, edozein unetan alda daiteke eta.

Eskabidearen osteko izapideak, modu elektronikoan, euskadi.net-eko egoitza elektronikoan egingo dira, Nire kudeaketak atalean.

4.– Eskabideak osasun publikoaren eta adikzioen alorrean eskumena duen organoaren egoitza elektronikoan, euskadi.net-en, ageri den ereduaren arabekoak izango dira, eta eredu horretan adierazitako dokumentazio osagarriarekin batera zuzendu beharko zaizkio Osasun Sailaren Osasun Publikoaren eta Adikzioen Zuzendaritzari.

5.– Erakunde eskatzaileek eurek aukeratuko dute zer hizkuntza ofizialetan aurkeztu laguntza jasotzeko eskabidea eta horri erantsi beharreko dokumentazioa. Era berean, erakunde eskatzaileak hautatutako hizkuntza erabiliko da laguntza-eskabidearen ondoriozko jarduketetan eta prozedura osoan, hala ezarri baitu Euskararen erabilera normalizatzeko azaroaren 24ko 10/1982 Oinarrizko Legeak.

6.– Laguntzak eskatu dituzten erakundeek zerga-betebeharrak eta Gizarte Segurantzakoak betetzen dituztela automatikoki egiaztatuko ditu erakunde kudeatzaileak, behar beste aldiz, eskatzaileen onspenaren beharrik gabe, azaroaren 11ko 1/1997 Legegintzako Dekretuaren 50.3. artikulua aplikatuz. Dekretu horren bidez onartzen da Euskal Autonomia Erkidegoko Ogasun Nagusiaren Antolarauei buruzko Legearen Testu Bategina.

7.– Eskabideek barne hartuko dute aukera hau: laguntza eskatu duen erakundeak espresuki baimena ematea Osasun Publikoaren eta Adikzioen Zuzendaritzari dokumentazioaren parte bat eskura edo egiazta dezan, hargatik eragotzi gabe Administrazio Publikoak bere dituen egiaztatze, kontrolerako eta ikuskatzeko ahalmenak.

– Pertsona fisikoen nortasun-datuak:

Kanal elektronikoan, interesdunak, aitortutako ziurtagiri elektroniko batekin identifikatu bada, ez du agiririk aurkeztu beharko.

Aurrez aurre edo bertaratuta: pertsonak baimena ematen badu Administrazioak nortasun-datuak egiazta ditzan eskumena duen Administrazioan, ez du beste agiririk aurkeztu beharko, eta hauxe markatu beharko du eskabidean:

Baimena ematen diot deialdiaren erakunde kudeatzaileari eskumena duen Administrazioan egiaztatze edo ziurtatzeko, bide telematikoen bidez, edo, hala badagokio, eskura daudenen bidez.

Pertsonak baimenik ematen ez badio Administrazioari datuak egiazta ditzan, honela ekar daitezke datu horiek: paperean (fotokopia) edo euskarri elektronikoan (eskanerretik pasatako kopia, pdf formatuan, eta elektronikoki sinatua); eta honela egiaztatuko dira: Nortasun-agiri nazional, pasaporte edo pertsona fisikoaren nortasuna egiaztatze balio duen antzeko dokumenturen baten bidez.

8.– Euskal Autonomia Erkidegoko Ogasun Nagusiaren Antolarauei buruzko Legearen Testu Bategina onartzen duen azaroaren 11ko 1/1997 Legegintzako Dekretuaren 50.6 artikulua aplikatuz, erantzukizunpeko adierazpen baten bidez egiaztatuko dira eskabide normalizatuan ondorengo betebeharrak:

a) Jakinaraztea helburu bererako diru-laguntzak, laguntzak, diru-sarrerak edo beste baliabide batzuk eskatu direla, eta, hala balitz, lortu, beste edozein administrazio edo erakunde publiko zein pribatutan.

b) Hauxe egiaztatzea: Euskal Autonomia Erkidegoko Administrazio Orokorrak edo haren erakunde autonomoek emandako izaera bereko laguntzen edo diru-laguntzen esparruan, ez dagoela sartuta inongo itzulketa- edo zehapen-prozeduretan, edo prozedura horiek amaituta daudela.

Halaber, Agindu honetan aurreikusitako laguntzak erakunde onuradunei ematea eta, hala bada-gokio, ordaintzea, baldintzapean geratuko da; hain zuzen ere, Euskal Autonomia Erkidegoko Administrazio Orokorrak eta horren erakunde autonomoek emandako izaera bereko diru-laguntzen esparruan hasita dauden baina oraindik bideratzen ari diren itzulketa- edo zehapen-prozedura guztiak amaitzearen baldintzaren pean.

c) Hauxe ere egiaztatzea: erakunde eskatzaileak ez duela zehapen administratiborik edo penalik, laguntza edo diru-laguntza publikoak lortzeko aukera kentzen dionik, eta ez duela laguntza horiek jasotzen uzten ez dion legezko debekurik, Emakumeen eta Gizonen berdintasunerako otsailaren 18ko 4/2005 Legearen azken xedapenetatik seigarrenean ezarritakoa barne.

9.– Gainera, erantzukizunpeko adierazpen batez egiazta daitezke hauek ere:

– Erakundea legez eratuta dagoela, eta Euskal Autonomia Erkidegoko dagokion erregistroan inskribatuta.

Kasu horretan, onuradun izateko proposatzen diren pertsonak egiaztatu beharko dute, dena delako laguntza edo diru-laguntza emateko prozedura ebatzi baino lehen egiaztatu ere, erantzukizunpeko adierazpenean jasotako datuak egiazkoak direla, dagozkion agiriak aurkeztuta edo erakunde kudeatzaileari baimena emanda adierazitakoak egiazkoak direla ziurtatzeko.

5. artikulua.– Instituzio eta erakunde onuradunen betebeharrak.

Euskal Autonomia Erkidegoko Ogasun Nagusiaren Antolarauei buruzko Legearen Testu Bategineko 50.2 artikuluan adierazitako betebeharrak, aplikatzekoak diren heinean, alde batera utzi gabe, laguntzen onura jaso duten instituzio eta erakundeek hauek bete beharko dituzte, Agindua-ren beste artikuluetan ezarritakoez gain:

– Diru-laguntza onartzea. Hain zuzen ere, onartutzat emango da diru-laguntza, baldin eta diru-laguntzaren esleipenaren jakinarazpena jaso eta hamabost eguneko epean, erakunde onuradunek diru-laguntza horri beren beregi uko egiten ez badiote.

– Diruz lagundutako jardueren xede edo izaeraren aldaketa ekar dezakeen edozein gertakizunen berri ematea, eta Osasun Sailari laguntzea jarduera horien egiaztapen, ikuskapen, jarraipen eta kontrolerako prozeduretan.

– Eusko Jaurlaritzako Osasun Sailaren babesa berariaz jasotzea diruz lagundutako jarduera guztietan, baldin eta zabaltzeko edo, hala bada-gokio, argitaratzeko badira.

– Diru-laguntzen norakoa eta erabilera bermatzea erlazio- nahiz ondasun-bermeen bitartez, abenduaren 17ko 698/1991 Dekretuaren lehenengo tituluan aurreikusitakoaren arabera; Dekretu horren bitartez, Euskal Autonomia Erkidegoko Aurrekontu Orokorraren kontura emandako diru-laguntzen bermeen eta itzultzeen araubide orokorra, eta diru-laguntza horien kudeaketan esku hartzen duten erakunde kolaboratzaileen betekizun, erregimen eta eginbeharrak ezarri ziren.

– Euskal Autonomia Erkidegoko Emakumeen eta Gizonen Berdintasunerako V. Planean adierazitako konpromisoei jarraikiz, eta Emakumeen eta Gizonen Berdintasunerako otsailaren 18ko

4/2005 Legeak 18.4 artikuluan adierazitakoa betez, laguntzearako agindu honetako jardueren ondorioz sortutako memoria, proiektu eta bestelako testu idatzietan hizkera sexistarik ez erabiltzea.

6. artikulua.– Eskabideko akatsak zuzentzea.

Diru-laguntzak jasotzeko eskabideak osorik betetzen ez badira, edo laguntza-kapitulu bakoitzean zerrendatutako dokumentazioa faltan badute, errekerimendua egingo zaio interesdunari, hamar eguneko epean zuzendu ditzan akatsak edo aginduzko dokumentuak aurkeztu. Hauxe ere jakinaraziko zaio: hala egin ezean, eskabidean atzera egin duela joko dela. Administrazioa behartuta dago eskaera horri buruzko berriazko ebazpena ematera eta ebazpen hori jakinaraztera, Herri Administrazioen Araubide Juridikoa eta Administrazio Prozedura Erkidea arautzen duen azaroaren 26ko 30/1992 Legeak —urtarrilaren 13ko 4/1999 Legeak aldatuak— 71.1 eta 42.1 artikuluetan xedatutakoari jarraikiz.

7. artikulua.– Diru-laguntzaren baldintzak aldatzea.

Diru-laguntza emateko kontuan hartutako baldintzen edozein aldaketa gertatuz gero —betiere, diru-laguntzaren helburua betetzat jotzen bada—, edo beste diru-laguntzarik pilatuz gero —berdin dio administrazio publiko honek edo beste batzuek edo beste erakunde publiko zein pribatu batzuek emana izan—, diru-laguntza emateko ebazpena alda daiteke. Ondorio horietarako, Osasuneko sailburuordeak dagokion likidazio-ebazpena emango du, eta, bertan, emandako diru-laguntzen zenbatekoak egokituko dira, diru-laguntza emateko ezarritako irizpideak eta mugak aplikatuz, eta diru-laguntza jaso duten instituzioek eta erakundeek itzuli egin beharko dute jaso duten gehiegizko kopurua.

8. artikulua.– Datuen babesa.

Agindu honetan aurreikusitako diru-laguntzak eskatzean ematen diren datuak «Droga-mendekotasunarekin erlazionatutako laguntzak eta diru-laguntzak» eta «Laguntzak jasotzea dagokien entitateak» fitxategi automatizatueta sartuko dira, Osasun eta Kontsumo sailburuaren 2011ko abenduaren 22ko Aginduan ezartzen den moduan; agindu horren bitartez arautzen dira Osasun eta Kontsumo Sailaren eta Kontsumobideren izaera pertsonaleko datuen fitxategiak, Izaera Pertsonaleko Datuak Babesten dituen abenduaren 13ko 15/1999 Lege Organikoak (DBLO) xedatutakoari jarraikiz. Fitxategi horien helburua diru-laguntzen espedienteak kudeatzea da, eta datuen segurtasuna bermatzeko segurtasun-neurri guztiak dituzte; hain zuzen ere, datu horiek ez zaizkie hirugarren batzuei jakinaraziko, lege ezarritako kasuetatik kanpo. Nahi izanez gero, datuak eskuratzeko, zuzentzeko, deuseztatzeko eta haiei aurka egiteko eskubideak erabil daitezke, espresuki aitortzen baititu DBLOk; horretarako, idazki bat igorri beharko zaio Osasun Saileko Osasun Publikoaren eta Adikzioen Zuzendaritzari.

Administrazio Publikoak bere esku izango du aurkeztu zaizkion datuak erkatzea, bai eta egoki irizitako egiaztapenak egitea ere, laguntzak behar bezala esleitzeko.

9. artikulua.– Kudeaketa, ebazpena, errekursoak eta publizitate-prozedura.

1.— Osasun Publikoaren eta Adikzioen Zuzendaritza izango da Agindu honetan araututako laguntzak kudeatzeko organo eskuduna.

2.— Lehiaketaren prozeduraren bidez ebatziko dira III. eta IV. kapitulueta aurreikusitako laguntzak. Aurkeztutako eskabideak balioesteko, dagokion balioespen-batzordea eratuko da, eta hauek izango ditu kide: Osasun Publikoaren eta Adikzioen zuzendaria —batzordeburua izango da—, Hiesaren prebentzioko planaren arduraduna eta Osasun Saileko lurralde-ordezkaritzetako Osasun

Publikoaren eta Adikzioen zuzendariordeak. Kide anitzeko organoko idazkaritzari dagokionez, batzordeburuak batzordekideen artean izendatutako pertsonak beteko du. Balioespen-batzordeko osaera parekidea bilatuko da, Emakumeen eta Gizonen berdintasunerako otsailaren 18ko 4/2005 Legeak 3.7. artikuluan xedatutakoa bete dadin.

3.– II. kapituluaren aurreikusitako laguntzak jasoko dituzte eskabideak behar den epean eta moduan aurkeztu dituzten erakunde guztiek, baldin eta Agindu honen 14. eta 15. artikuluetan ezarritako baldintzak betetzen dituztela egiaztatzen badute.

4.– II. kapituluaren aurreikusitako laguntzetara aurkeztutako proiektuak Osasun Publikoaren eta Adikzioen Zuzendaritzak aztertu eta balioetsiko ditu, eta, gainera, irizpen espezializatueta jotzeko aukera ere izango du.

5.– Osasuneko sailburuordearen ebazpen bidez emango dira laguntzak.

Laguntzak kudeatzen dituen organoak edo balioespen-batzordeak egoki iritzitako informazio eta dokumentazio osagarri guztia eskatu ahal izango diete erakunde eskatzaileei, aurkeztutako proiektua edo jarduera hobeto ulertzeko behar badute.

2014ko azaroaren 30a baino lehen ebatzi behar dira Agindu honen bidez emango diren laguntzetarako eskabideak.

6.– Laguntzak emateko ebazpenek erakunde onuradunaren betebeharrak adieraziko dituzte, Agindu honen 5. artikuluan baitaude aurreikusita betebeharrak horiek, eta beren-beregi aipatuko dute onuradunaren beste betebeharrak: laguntzen destinoa fiskalizatzeko funtzioak betetzean, Kontrol Ekonomikoko Bulegoak edo Herri Kontuen Euskal Epaitegiak eskatzen duten informazio guztia ematea.

7.– Publizitate-printzipioa betetzeko, eta hargatik eragotzi gabe ebazpenak espresuki eta banan-banan jakinaraztea, Euskal Herriko Agintaritzaren Aldizkarian argitaratuko dira, Osasuneko sailburuordearen ebazpen bidez argitaratu ere, xedapen honen babesean emandako diru-laguntzen onuradun gertatu diren erakundeen zerrenda (esleitutako kopuruak adierazita), eta hasiera batean emandako diru-laguntza aldatu zaien zerrenda.

8.– Osasuneko sailburuordeak Agindu honi jarraiki sinatutako emate- edo ukatze-ebazpenek ez diote amaiera ematen administrazio-bideari, eta ebazpen horien aurka gora jotzeko errekurtoa aurkeztu ahal izango zaio Osasuneko sailburuari, Herri Administrazioen Araubide Juridikoa eta Administrazio Prozedura Erkidea arautzen duen azaroaren 26ko 30/1992 Legearen 114. eta 115. artikuluetan xedatutakoaren arabera.

10. artikulua.– Ezestea, isiltasunagatik.

Agindu honen babesean egindako laguntza-eskaerak ebatzi eta jakinarazteko aurreko artikuluan ezarritako epea igaro ondoren, berariazko ebazpenik eman ez bada, eskaerak ezetsizat hartuko dira, Herri Administrazioen Araubide Juridikoa eta Administrazio Prozedura Erkidea arautzen duen azaroaren 26ko 30/1992 Legearen 44.1. artikuluan ezarritakoaren ondorioetarako; edonola ere, Administrazioak badu berariaz ebazteko betebeharra.

11. artikulua.– Baliabide ekonomikoak eta laguntzen muga.

1.– Agindu hau betetzeko, 2.200.000 euroko gehieneko kopurua zuzenduko da. Adierazitako zenbatekoa honela zatikatuko da, II. kapitulutik IV.era bitarteko lerroen artean:

– Adikzioen prebentzio komunitariorako talde teknikoak mantentzeko (II. kapituluaren): 986.601 euro.

– Tokiko planetara atxikitako adikzioen prebentzio komunitariorako proiektuak garatzeko (III. kapitulua): 472.040 euro.

– Arriskuak eta kalteak prebenitzeko eta gutxitzeko proiektuak egiteko (IV. kapitulua): 741.359 euro.

2.– II. kapituluan aurreikusitako laguntzei esleitutako baliabide ekonomikoen zuzkidura edo dotazioa iristen ez bada 17 artikulua gehienez ahalbidetzen duen zenbatekoraino, edo eskatutako zenbatekoraino, txikiagoa balitz, laguntzen artean banatuko da dotazioa, behar adina funts egongo balitz laguntzei legokiekeen zenbatekoaren proportzioan.

3.– III. eta IV. kapituluetan aurreikusitako laguntzetan uko egiterik gertatuz gero, emandako diru-laguntza onartzeko epea igarota, ebazpen bat idatziko da, zeinak, balioespen-batzordeak emandako puntuazio-hurrenkera aintzat hartuta, uko egiteetatik ateratako zenbatekoa esleituko baitu.

12. artikulua.– Ez betetzeak.

Euskadiko Ogasun Nagusiaren Antolarauei buruzko Legearen Testu Bateginaren 53.1 artikuluan aipatzen diren kasuetakoren batean badago diru-laguntza jaso duen erakunde onuraduna, edo agindu honetan nahiz aplika daitekeen gainerako araudian edo diru-laguntza emateko ebazpenean ezarritako baldintzaren bat betetzen ez badu, Osasuneko sailburuordeak ebazpen bat emango du; horren bitartez, ordaintzeko dauden kopuruak jasotzeko eskubidea galdu dela adieraziko du, eta, hala badagokio, jasotako diru-laguntza eta aplika daitezkeen legezko interesak —diru-laguntza ordaindu zenez geroztikoak— Euskal Herriko Diruzaintza Nagusira itzuli behar direla, hargatik eragotzi gabe abenduaren 17ko 698/1991 dekretuan ezarritakoaren arabera bidezko litezkeen gainerako akzioak. Aipatu zenbatekoak diru-sarrera publikotzat hartuko dira legezko ondorioetarako, eta hauxe izango dute erantzukizun-araubide: Euskal Autonomia Erkidegoko Herriogasuntza Nagusiaren Antolarauei buruzko Legearen Testu Bateginaren 64. artikuluan xedatutakoa.

Artículo 13.– Itzulketa-prozedurak.

Aurreko artikuluan aurreikusitako ez betetzeen kasuetan, hau izango da jasotako laguntzak itzultzeko prozedura:

Prozedura hasteak, edonola ere, eten egingo ditu oraindik egiteke dauden ordainketak.

Osasuneko sailburuordeak prozedura hasi dela eta zergatik hasi den adieraziko dio interesdunari, eta 15 eguneko epea emango dio egoki iritzitako alegazioak aurkez ditzan.

Alegazioak jaso ondoren, edo alegazio-epea alegaziorik egin gabe amaitzen bada, amaiera emango zaio prozedurari, Osasuneko sailburuordearen ebazpen bidez eman ere.

Itzultzeko prozedura, gehienez ere, hamabi hilabetean ebatzi behar da.

Ebazpenak aintzat hartuz gero ez betetzeren bat egon dela, diru-laguntza jasotzeko eskubidea galdu dela deklaratu du, eta, hala badagokio, bidezko zenbatekoak bi hilabeteko epean, gehienez ere, Euskal Herriko Diruzaintza Nagusiarantz itzuli beharra. Ebazpena jakinarazten den egunetik hasiko da epearen zenbaketa. Epe hori izango da borondatezko aldiaren epea.

Dagozkion kopuruak borondatezko aldiaren itzuli ez badira, Eusko Jaurlaritzaren Ogasun eta Finantza Saileko Ogasun eta Finantza Sailburuordetzari jakinaraziko zaio, aplikagarri den legezko araudian xedatutakoa betez joko dezan.

II. KAPITULUA

TALDE TEKNIKOAK MANTENTZEKO LAGUNTZAK

14. artikulua.– Erakunde onuradunak.

1.– 8.000 biztanletik gorako EAEko toki-erakundeak (udalak, mankomunitateak edo par-tzuergoak) bildu ahalko dira adikzioen prebentzio komunitariorako talde teknikoak mantentzeko laguntzetara; betiere, drogamendekotasunei edo adikzioei buruzko toki-plana onetsita badute edo prestatzen ari badira.

Halaber, adikzio-gaien arloko talde teknikorik eratzeko behar besteko ahalmenik ez duten 8.000 biztanletik beherako toki-erakundeei begira, erakunde hauek jaso ahal izango dituzte laguntza horiek:

a) EAEko foru-aldundiek, baldin eta toki-erakundeen multzo bateko biztanleen beharrei erantzuteko teknikariak badituzte eta baldintza hauek betetzen badira:

– Toki-erakundeen multzo horrek mankomunitaterik ez osatzea (mankomunitatea osatuz gero, mankomunitatea bera izango litzateke hartzailea).

– Artatutako populazio guztia 8.000 biztanle baino gehiago izatea.

b) Hurbileko beste herri batzuen beharrei erantzuten dieten teknikariak dituzten EAEko udalak, baldin eta arreta ematen zaien herri horien populazioa, guztira, zuzenbideko 8.000 biztanletik gorakoa bada.

2.– Agindu honen 15.2. artikuluan ezarritakoa alde batera utzi gabe, adikzioen prebentzio komunitariorako talde teknikoek funtzio nagusitzat izango dute Adikzioen Tokiko Planean finkatutako helburuak betetzea —drogamendekotasunen arloko prebentzio, asistentzia eta gizarteratzeari buruzko ekainaren 25eko 18/1998 Legearen 4., 36.4., eta 37.2. artikuluetan aipatzen dira horiek—.

15. artikulua.– Talde teknikoen betekizunak, eginkizunak eta osaera.

Talde teknikoek, kapitulu honetan aurreikusitako laguntzak jasoko badituzte, ezinbesteko baldintza izango dute ondoko paragrafoetan xedatutakoari egokitzea, betekizunei, eginkizunei eta osaerari dagokienez:

1.– Talde teknikoek betekizun hauek konplitu behar dituzte:

– Lanbide-trebakuntza egokia izatea, eraginkortasunez gauzatzeko Euskal Autonomia Erkidegoaren esparruan adikzioen prebentzio komunitarioari lotutako politika.

– Erakunde eskatzailearen gizarte-zerbitzuen jarraibideak kontuan izanda jardungo du talde teknikoak, zeinaren kontratazioaren kostu ekonomikoa erakunde eskatzaileak hartuko baitu bere gain.

2.– Talde teknikoek, Agindu honen 14.2 artikuluan xedatutakoaz gain, ondoko eginkizunak izango dituzte:

a) Komunitatean dagoen adikzioen fenomenoaren ondo ezagutzeko beharrezkoak diren ekintzak garatzea, osasunerako hezkuntza sustatuz.

b) Udal-arloei eta erakunde laguntzaileei aholkularitza ematea adikzioen esparruko jardueren plangintzan eta Adikzioen Tokiko Planaren garapenean, esku-hartze integrala eta koordinatua lortzeko.

c) Pertsonen, familiei eta taldeei informazioa eta aholkularitza ematea komunitatean eskuragarri dauden gizarte-baliabideei buruz, eta, hala badagokio, ohiko gizarte-laguntzara edo zerbitzu espezializatuera bideratzea (hala eskatzen duten kasuetan).

d) Eginkizunak garatzerakoan, lankidetzan aritzea osasun eta hezkuntza zerbitzuekin eta arriskuak eta kalteak prebenitzeko eta gutxitzeko zerbitzuekin.

e) Administrazio publikoari laguntzea eta irabazi asmorik gabeko ekimen pribatuak sustatzea. Eusko Jaurlaritzak sustatutako udalez gaindiko esparruko proiektuak gauzatzeko lagunduko dute bereziki.

f) Adikzioen arrisku eta kalteak prebenitzeko eta gutxitzeko berariazko jardun-programen garapenean kontuan hartzen diren guztiak.

3.– Adikzioen prebentzio komunitarioko talde teknikoek langile hauek eduki behar dituzte:

– 8.001 biztanletik 20.000ra bitarteko populazioa duten toki-erakundeetan: goi-mailako edo erdi-mailako titulazioa izango duen pertsona bat, lanaldi osoan.

– 20.001 biztanletik 45.000ra bitarteko populazioa duten toki-erakundeetan: goi-mailako edo erdi-mailako titulazioa izango duen pertsona bat, lanaldi osoan, eta administrari-laguntzaile bat, lanaldi erdian.

– 45.000 biztanletik gorako populazioa duten toki-erakundeetan: goi-mailako edo erdi-mailako titulazioa izango duten bi pertsona eta administrari-laguntzaile bat, guztiak lanaldi osoan.

– Foru-diputazioentzako eta hurbileko beste herri batzuen beharrei erantzuten dieten udalentzako laguntzei dagokienez, gainerako toki-erakundeen baldintza berberetan finantzatuak dira taldeak, alegia, kontuan harturik zenbat biztanle dituen toki-erakundeen multzo bakoitzak.

16. artikulua.– Eskabideen memorietan jaso beharreko datuak.

1.– Eskabideen memoriek jarraitu beharreko eredia hemen argitaratuko da: Osasun Publikoaren eta Adikzioen Zuzendaritzak euskadi.net-en duen egoitza elektronikoan.

2.– Talde teknikoak mantentzeko laguntzetarako eskabideen memoriek datu hauek eduki behar dituzte, gutxienez:

– Talde teknikoaren deskribapena; helburuak, aurreikusitako proiektuak, eta zerbitzua emateko modua jasoko dira bertan.

– Talde teknikoak osatuko dituzten pertsonen kopurua: izen-abizenak, lanbide-maila eta titulazioa, lanaldi mota (osoa edo erdia), adikzioen prebentzio komunitarioari eskainitako denbora (orduak, lanpostuari dagozkion funtzioak eta garatutako egiteko zehatzak), lan-kontratuaren hasiera eta amaiera eguna eta taldekide bakoitzaren lan-kostua (Gizarte Segurantzaren barne).

– Zerbitzuak erabil ditzakeen baliabide materialak.

3.– Laguntza-mota honetara bildutako erakundeek Drogamendekotasunen eta Adikzioen Tokiko Planari dagokion atala bete behar dute «Erantzukizunpeko Adierazpenak» erudian, eta plana indarrean dagoela jaso. Plan hori egiten ari diren erakundeek kasuan, erakunde horretan fede publikoa duen pertsonaren ziurtagiria aurkeztuko da, plana prestatzen ari direla egiaztatzeko.

4.– Zerbitzua azpikontratatuta duten udalek, azpikontratatutako erakundearekin duten kontratuaren kopia bat aurkeztu behar dute. Kontratuan agertzen ez bada, informazio hau eman behar da:

- Kontratutako langileen prestakuntzari dagokion jatorrizko titulua edo fotokopia.
- Kontratatuak adikzioen prebentzio komunitarioari eskainitako denbora (orduak, lanpostuari dagokion funtzioak eta garatutako egiteko zehatzak).
- Kontratutako langile horien lan-kostua (Gizarte Segurantzaren barne).

17. artikulua.– Zenbatekoa eta ordaintzeko modua.

1.– Aipatutako talde teknikoek 2014ko ekitaldian izango duten langileen kostuaren % 75eraino finantzatu ahal izango du Osasun Sailak. Ehuneko hori aplikatuko zaion oinarria ez da ezein kasutan ondokoak baino handiagoa izango:

- Lanaldi osoko goi-mailako teknikaria: 45.470 euro (Gizarte Segurantzaren gastuak barne).
- Lanaldi osoko erdi-mailako teknikaria: 37.245 euro (Gizarte Segurantzaren gastuak barne).
- Lanaldi osoko langile administrariak: 30.024 euro (Gizarte Segurantzaren gastuak barne).

2.– Ordainketa zatika egingo da. Lehen % 80a laguntza onartzean ordainduko da, eta gainerako % 20a, berriz, ekitaldia amaituta eta dagokion toki-erakundearen fedea publikoa duen pertsonak egiaztagiria eman ondoren. Hauek jaso beharko dira egiaztagiri horretan: eskabidean exijitutako talde teknikoak osatu dituzten pertsonen datuak eta talde tekniko horien kontratazioaren ondoriozko guztizko kostu ekonomikoa. Ezarritako ereduaren arabera izan behar du ziurtagiri horrek, eta 2015eko martxoaren 1a baino lehen aurkeztu behar da.

Era berean, Osasun Sailaren Osasun Publikoaren eta Adikzioen Zuzendaritzara bidali beharko da justifikazio-memoria bat, diruz lagundutako jarduera edo proiektua balioetsiz eta zenbateraino bete den adieraziz. Hala ere, toki-erakundeak Agindu honen III. kapituluko laguntzak ere eskatu baditu, ez du justifikazio-memoria hori zertan aurkeztu, 21. artikuluan adierazitakoa besterik ez du aurkeztu beharko eta.

Memoria hori, atal guztiak behar bezala beteta dituela, aurrez aurre aurkez daiteke Eusko Jaurlaritzaren Herritarrei Laguntzeko bulegoetan, Eusko Jaurlaritzaren ordezkarietan edo Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legeak 38.4. artikuluan aurreikusitako erakundeetan. Hemen aurki daiteke ereduak: Osasun Publikoaren eta Adikzioen Zuzendaritzak euskadi.net-en duen egoitza elektronikoan.

Era berean, bide elektronikoak ere erabili ahal izango dira justifikazioak aurkezteko, euskadi.net/Nire kudeaketak atalaren bidez. Informazioa eta prozedura eskura izango dira osasun publikoaren eta adikzioen arloan eskumena duen erakundeak euskadi.net-en duen egoitza elektronikoan, 3. artikuluan aurreikusitako izapidetze elektronikoaren jarraibideetan azaldutako prozeduraren eta jardueren arabera.

III. KAPITULUA

ADIKZIOEN PREBENTZIO KOMUNITARIOKO PROGRAMAK GARATZEKO LAGUNTZAK

18. artikulua.– Xedea eta erakunde onuradunak.

1.– Kapitulu honen xedea da: arriskuak eta kalteak prebenitzeko eta gutxitzeko programak eta esku-hartzeak 2014an garatzeko, EAEko toki erakundeei emango zaizkien diru-laguntzak arautzea. Programa eta esku-hartze horiek adikzioen edo drogamendekotasunen alorreko tokiko planetan egon behar dute —plan horiek onartuta edo prestatzeko prozesuan daudela—. Udalek banaka edo mankomunitatuta prestatu eta garatu behar dituzte plan horiek, eta ekintza egituratu eta koordinatuen multzo ordenatu bat osatu behar dute.

Programa horiek garatzeko berezko ekintzez gain, programa horiei laguntzeko jarduerak ere hartzen dira kontuan, Adikzioen VI. Planak emandako definizioari jarraiki, baldin eta behar bezala justifikatuta badaude.

2.– Zuzenean edo erakunde espezializatuekin lankidetzan beren lurralde-esparruan adikzioen prebentzio komunitariorako programak kudeatzen dituzten toki-erakundeak bildu ahal izango dira adikzioen prebentzio komunitariorako proiektuak garatzeko laguntzetara. Halako programatzat hartuko dira gizarte-komunitatearen gaitasuna sustatzeko helburua dutenak eta adikzioen fenomenoan eta osasunerako hezkuntzan lan egiteko jarduerak garatzen dituztenak.

19. artikulua.– Eskabideen memorietan jaso beharreko datuak eta dokumentazio osagarria.

1.– Erakunde eskatzaile bakoitzak laguntza-eskabide bakarra aurkeztu behar du garatu beharreko jarduerak finantzatzeko; horrenbestez, programa bakar batean bildu behar dira egin nahi diren proiektu guztiak. Eskabide horrek Osasun Publikoaren eta Adikzioen Zuzendaritzak euskadi.net-en duen egoitza elektronikoan argitaratuko duen ereduaren arabera izan behar du, eta gutxienez datu hauek eduki behar ditu:

– Programa aurkezten duen erakundearen eta pertsonaren identifikazio-datuak: nor den, zein erakunde eta zeren gisa ordezkatzeko duen eta kokapen-datuak: posta-helbidea, telefonoa...

– Programaren izena.

– Erakunde sustatzailea.

– Programarako harremanaz arduratzen den teknikariaren datuak.

– Proiektua nola txertatzen den Euskal Autonomia Erkidegoko Adikzioen VI. Planean (2011-2015). Programa osatzen duten proiektu bakoitzaren lerroa, programa eta kostua zehaztu behar dira.

– Programa nola txertatzen den Drogamendekotasunen edo Adikzioen Tokiko Planean, edo Tokiko Planaren ildo estrategikoetan, lantzeko fasean baldin badago.

– Programa nola garatuko den (deskribapena).

– Justifikazioa edo arrazoiak: egoeraren diagnostikoa.

– Programaren eta programa sustatzen duen erakundearen historia laburra.

– Oinarri teorikoak: zein arlotan eragin nahi den.

– Programaren xedeak: helburu orokorra, helburu bereziak eta helburu operatiboak.

– Programaren jarduerak honako fase hauetan: plangintza eta diseinua, inplementazioa eta gauzatzea, ebaluazioa eta aurreikusitako beste fase batzuk.

– Programaren baliabideak, koordinazioa eta sareko lana barne.

– Programaren aurrekontua, bi puntu hauek ere adierazita: kostu osoa, kontzeptuen arabera banaturik, eta diru-sarrerak.

2.– Laguntza-mota honetara bildutako erakundeek Drogamendekotasunen eta Adikzioen Tokiko Planari dagokion atala bete behar dute «Erantzukizunpeko Adierazpenak» eredian, eta plana indarrean dagoela jaso. Plan hori egiten ari diren erakundeen kasuan, erakunde horretan fede publikoa duen pertsonaren ziurtagiria aurkeztuko da, plana prestatzen ari direla egiaztatzeko.

20. artikulua.– Esleitzeko irizpideak eta horien ponderazioa.

1.– Lehiaketa izaki laguntzak esleitzeko prozedura, aurkeztutako eskabideak alderatuz emango dira laguntzak. Horretarako, artikulua honetan agertzen diren balioespen-irizpideak erabiliko dira, eskabide guztien arteko lehentasun-hurrenkera ezartze aldera. Honako hauek dira balioespen-irizpideak, horien ponderazioa adierazita:

a) Diseinuaren kalitate teknikoa: harreman koherentea izatea eragin nahi zaien faktoreen, lortu nahi diren helburu espezifikoaren, helburu horiek eskuratzeko aurreikusitako jardueren eta helburu horien lorpen-mailaren adierazlearen ebaluazioaren artean: 12 puntura bitartean.

b) Zuzenean edo zeharka hartzaile edo onuradun izango diren pertsonen kopurua. Jardueraren biztanleria-estaldura: 9 puntura bitartean.

c) Jarduera gizarte-ekimeneko beste erakunde batzuekin, gizarte- eta osasun-eremuetako edo eremu soziosanitarioko beste federazio edo erakunde batzuekin koordinatuta eta lankidetzan gauzatzea, eta sare-lana sustatzea: 6 puntura bitartean.

d) Proposatutako jarduerak izaera berritzailea izatea, edo aurreko urtearekin alderatuta, hobekuntza berritzaileak sartzeari proiektuan: 3 puntura bitartean.

e) Erakundearen ibilbidea eta esperientzia, eta proposatutako jarduerak edo proiektuak jarraipena duen: 6 puntura bitartean.

f) Erakunde horiei lehenago diruz lagundutako programak/proiektuak zehatz betetzea eta justifikatzea: 3 puntura bitartean.

g) Erakunde eskatzailearen parte-hartze ekonomikoa: 3 puntura bitartean.

h) Ebaluazioaren kalitatea: helburu operatiboaren eta datuak eskuratzeko metodoaren artean koherentzia egotea: 14 puntura bitartean.

i) Arrisku-maila (VI. Planean ezarrita dagoen bezala ulerturik, alegia, babesgabetasuna edo/eta bazterkeria bezala ulertuta), arrisku eta kalteen prebentzio-programaren hartzaile diren kolektibo edo pertsonena; bereziki, alkoholaren kontsumoa prebenitzeko programak zuzentzen zaizkien adingabekoez ari garela: 14 puntura bitartean.

j) Programaren eraginkortasuna: programaren kostuaren, onuradun kopuruaren eta programa aplikatzeak eragingo dituen onuren arteko erlazioa: 12 puntura bitartean.

k) Genero-ikuspegia sartzeari: adikzioen arloko prebentziorako programa batek ikuspegi hori ere hartzen du baldin eta diseinatu, gauzatu eta ebaluatzean gizon eta emakumeen egoera, baldintza eta behar desberdinak aintzat hartzen baditu: 6 puntura bitartean.

l) Diagnostikoaren kalitatea: beharrak eta hutsuneak antzemateko azterketa gisa planteatutakoa bat etortzea eragin nahi zaien faktoreekin eta eskuratu nahi diren helburuekin: 12 puntura bitartean.

2.– Aurreko atalean jasotako irizpideak erabiliz eskabideen artean lehenespena ezarrita, puntu gehien lortzen dituzten eskabideei esleituko zaizkie laguntzak, harik eta laguntza-lerro horretarako izendatutako zuzkidura ekonomikoa agortu arte.

3.– Eman beharreko laguntzetako bakoitza zehaztu eta zenbatesteko, kopuru hauek biderkatu beharko dira: batetik, onartutako aurrekontuaren % 75 eta, bestetik, programa baloratzean lortutako puntuak kalkulatu sortzen den ehunekoa, programa batek artikuluko honen arabera lor ditzakeen puntuekikoa. Nolanahi ere, laguntzaren zenbatekoa ezin da izan eskatutako kopurua baino handiagoa.

21. artikulua.– Zenbatekoa eta ordaintzeko modua.

1.– Osasun Sailak % 75eraino finantzatu ahal izango du aurreko artikuluan ezarritako moduan onartutako aurrekontua. Onartutako aurrekontutzat hartuko da aurkeztutako programaren aurrekontu osoa. Eskabidean deskribatu eta programa osatzen duten proiektu guztietarako egokia eta doituia izan behar du aurrekontuak. Programaren zuzeneko kostuak baino ez dira onartuko.

Programa batek ere ez du jasoko kapitulu honi dagokion diruaren % 10a baino gehiago.

2.– Ordainketa zatika egingo da: % 80a, diru-laguntza onartzean, eta gainerako % 20a, berriz, Osasun Sailaren Osasun Publikoaren eta Adikzioen Zuzendaritzari diru-laguntza justifikatzeko memoria bidali ondoren, jarduera bukatu eta bi hilabete igaro aurretik bidali ere. Diruz lagundutako programa balioetsi behar da memorian, zenbateraino bete den adierazi, eta garapenaren balorazio kualitatiboa egin.

3.– Justifikazioak osasun publiko eta adikzioen alorrean eskumena duen organoaren egoitza elektronikoan eranskin gisa ageri den ereduaren arabekoak izango dira, eta Osasun Publikoaren eta Adikzioen Zuzendaritzari zuzenduko zaizkio.

Justifikazio-memoria horri «Jarraipen ekonomikoa» izeneko agiria erantsi behar zaio; hor egingo da gauzatutako aurrekontuaren laburpena eta justifikazio-kontua. Justifikazio-kontua erantzukizunpeko adierazpen bat da; hor agertu behar dira onartutako aurrekontu guztia, bai eta gastua egiaztatzeko agiri guztien zerrenda ere, adieraziz zer dokumentu mota den, norena, nork edo zer erakundek eman duen, kontzeptua, data, zenbatekoa eta programari egozteko ehunekoa.

Aurretik aipatutako justifikazio-kontuaz gain, dagokion toki-erakundean fede publikoa duen pertsonak egindako ziurtagiria ere eskatuko da, gauzatutako aurrekontua egiaztatzeko.

4.– Agiri horiek, atal guztiak behar bezala beteta dituztela, aurrez aurre aurkez daitezke Eusko Jaurlaritzaren Herriarrei Laguntzeko bulegoetan, Eusko Jaurlaritzaren ordezkarietan edo Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legeak 38.4. artikuluan aurreikusitako erakundeetan.

Era berean, bide elektronikoak ere erabili ahal izango dira justifikazioak aurkezteko. Informazioa eta prozedura eskura izango dira osasun publikoaren eta adikzioen arloan eskumena duen erakundeak euskadi.net-en duen egoitza elektronikoan, 3. artikuluan aurreikusitako izapidetze elektronikoaren jarraibideetan azaldutako prozeduraren eta jardueren arabera.

IV. KAPITULUA

ARRISKUAK ETA KALTEAK PREBENITZEKO ETA GUTXITZEKO PROIEKTUAK EGITEKO LAGUNTZAK

22. artikulua.– Xedea eta erakunde onuradunak.

1.– 2014. urtean adikzioen eremuko arriskuak eta kalteak prebenitzeko eta gutxitzeko proiektuak egiten dituzten irabazi-asmorik gabeko gizarte-ekimeneko erakundeak kapitulu honetan aurreikusitako laguntzetara bildu ahal izango dira, baldin eta betekizun hauek konplitzen badituzte:

a) Legearen barruan sortuak izan behar dute, eta dagozkien administrazio-erregistroetan edo -erroldean behar bezala erregistratuta egon behar dute diru-laguntzen deialdia baino urtebete lehenagotik, gutxienez.

b) Irabazi-asmorik gabekoak izan behar dute, edozein dutela ere forma juridikoa: elkartea, fundazioa, gizarte-ekimeneko kooperatiba edo irabazi-asmorik gabeko besteren bat; gainera, helburu publiko bat edo gizarte intereseko helburua lortzea sustatu behar dute.

c) Bere jarduera batez ere Euskal Autonomia Erkidegoan garatu behar dute.

d) Administrazioaren araei eta programazioari egokitzea.

e) Beren proiektuak eta aurrekontuak botere publikoen kontrolpean jarri behar dituzte.

2.– Agindu honen ondorioetarako, arriskuak eta kalteak prebenitzeko edo gutxitzeko proiektuetzat joko dira helburu hauek dituzten ekintzak zertzen dituztenak:

– Osasunerako hezkuntza sustatzea.

– Adikzioei lotutako kalteak gutxitzea.

– Drogen gehiegizko erabilera eta adikzio-jokabideak murriztea.

– Legezko eta legez kanpoko drogak hartzen dituztenei edo substantziarik gabeko adikzioen bat dutenei ahalik eta informazio eta prestakuntza gehien ematea.

Helburu horiek lortzeko berezko ekintzez gain, gizarte-sentsibilizaziorako eta laguntzarako ekintzak hartzen dira kontuan, hala nola baliabideen koordinazioa eta eragile komunitarioen parte-hartzearen plangintza, diseinua eta sustapena.

Helburu horiek lortzeko ekintzez gain, proiektu horiei laguntzeko jarduerak ere hartzen dira kontuan, Adikzioen VI. Planak emandako definizioari jarraiki, baldin eta behar bezala justifikatuta badaude.

3.– Dagokien aginduaren bitartez arautuko baitira, laguntza-lerro honetatik kanpo geratuko dira:

– GIB/hiesaren arriskuak eta kalteak prebenitu, kontrolatu edota gutxitzea xede duten proiektuak.

– GIB/hiesa duten pertsonentzako proiektuak.

– Kalteak prebenitu, kontrolatu edota gutxitzekoak, xedetzat hartuta arrisku txikiagoko kontsumorako materiala ematea (xiringen trukea...).

23. artikulua.– Eskabideen memorietan jaso beharreko datuak.

1.– Proiektu bakoitzeko eskabide-memoria bat bete behar da, eta Osasun Publikoaren eta Adikzioen Zuzendaritzak euskadi.net-en duen egoitza elektronikoa argitaratutako ereduaren arabera izan behar du eskabide-memoriak. Gutxienez, datu hauek eduki behar ditu:

–Proiektua aurkezten duen erakundearen eta pertsonaren identifikazio-datuak: nor den, zer erakunde eta zeren gisa ordezkatzeko duen eta kokapen-datuak: posta-helbidea, telefonoa...

- Proiektuaren izena.
- Erakunde sustatzailea.
- Proiekturako harremanaz arduratzen den teknikariaren datuak.
- Proiektua nola txertatzen den Euskal Autonomia Erkidegoko Adikzioen VI. Planean (2011-2015). Proiektuen lerroa eta programa zehaztu behar dira.
- Proiektua nola garatuko den (deskribapena).
- Justifikazioa edo arrazoiak: egoeraren diagnostikoa.
- Proiektuaren eta proiektua sustatzen duen erakundearen historia laburra.
- Oinarri teorikoak: zein arlotan eragin nahi den.
- Proiektuaren helburuak: helburu orokorra, helburu bereziak eta helburu operatiboak.
- Proiektuaren jarduerak honako fase hauetan: plangintza eta diseinua, inplementazioa eta gauzatzea, ebaluazioa eta aurreikusitako beste fase batzuk.
- Proiektuaren baliabideak, koordinazioa eta sareko lana barne.
- Proiektuaren aurrekontua, bi puntu hauek ere adierazita: proiektuaren kostu osoa, kontzeptuen arabera banaturik, eta proiekturako diru-sarrerak.

24. artikulua.– Esleitzeko irizpideak eta horien ponderazioa.

1.– Lehiaketa izaki laguntzak esleitzeko prozedura, aurkeztutako eskabideak alderatuz emango dira laguntzak. Horretarako, artikuluko honetan agertzen diren balioespen-irizpideak erabiliko dira, eskabide guztien arteko lehenetsun-hurrenkera ezartze aldera. Honako hauek dira balioespen-irizpideak, horien ponderazioa adierazita:

a) Diseinuaren kalitate teknikoa: harreman koherentea izatea eragin nahi zaien faktoreen, lortu nahi diren helburu espezifikoaren, helburu horiek eskuratzeko aurreikusitako jardueren eta helburu horien lorpen-mailaren adierazlearen ebaluazioaren artean: 12 puntura bitartean.

b) Zuzenean edo zeharka hartzaile edo onuradun izango diren pertsonen kopurua. Jardueraren biztanleria-estaldura: 9 puntura bitartean.

c) Jarduera gizarte-ekimeneko beste erakunde batzuekin, gizarte- eta osasun-eremuetako edo eremu soziosanitarioko beste federazio edo erakunde batzuekin koordinatuta eta lankidetzan gauzatzea, eta sare-lana sustatzea: 6 puntura bitartean.

d) Proposatutako jarduerak izaera berritzailea izatea, edo aurreko urtearekin alderatuta, hobekuntza berritzaileak sartzeko proiektuan: 3 puntura bitartean.

e) Erakundearen ibilbidea eta esperientzia, eta proposatutako jarduerak edo proiektuak jarraipena duen: 6 puntura bitartean.

f) Erakunde horiei lehenago diruz lagundutako programak/proiektuak zehatz betetzea eta justifikatzea: 3 puntura bitartean.

g) Erakunde eskatzailearen parte-hartze ekonomikoa: 3 puntura bitartean.

h) Ebaluazioaren kalitatea: helburu operatiboen eta datuak eskuratzeko metodoaren artean koherentzia egotea: 14 puntura bitartean.

i) Arrisku-maila (VI. Planean ezarrita dagoen bezala ulerturik, alegia, babesgabetasuna edo/eta bazterkeria bezala ulertuta), arrisku eta kalteen prebentzio-programaren hartzaile diren kolektibo edo pertsonena; bereziki, alkoholaren kontsumoa prebenitzeko programak zuzentzen zaizkien aingabekoez ari garela: 14 puntura bitartean.

j) Programaren eraginkortasuna: programaren kostuaren, onuradun kopuruaren eta programa aplikatzeak eragingo dituen onuren arteko erlazioa: 12 puntura bitartean.

k) Genero-ikuspegia sartzea: adikzioen arloko prebentziorako programa batek ikuspegi hori ere hartzen du baldin eta diseinatu, gauzatu eta ebaluatzean gizon eta emakumeen egoera, baldintza eta behar desberdinak aintzat hartzen baditu: 6 puntura bitartean.

l) Diagnostikoaren kalitatea: beharrak eta hutsuneak antzemateko azterketa gisa planteatutakoa bat etortzea eragin nahi zaien faktoreekin eta eskuratu nahi diren helburuekin: 12 puntura bitartean.

2.– Aurreko atalean jasotako irizpideak erabiliz eskabideen artean lehenespena ezarrita, puntu gehien lortzen dituzten eskabideei esleituko zaizkie laguntzak, harik eta laguntza-lerro horretarako izendatutako zuzkidura ekonomikoa agortu arte.

3.– Eman beharreko laguntzetako bakoitza zehaztu eta zenbatesteko, kopuru hauek biderkatu beharko dira: batetik, onartutako aurrekontuaren % 100 eta, bestetik, programa baloratzean lortutako puntuak kalkulatuta sortzen den ehunekoa, programa batek artikuluko honen arabera lor ditzakeen puntuekikoa. Nolanahi ere, laguntzaren zenbatekoa ezin da izan eskatutako kopurua baino handiagoa.

25. artikulua.– Zenbatekoa, ordaintzeko modua eta baldintzak.

1.– Osasun Sailak % 100eraino finantzatu ahal izango du aurreko artikuluan ezarritako moduan onartutako aurrekontua. Onartutako aurrekontutzat hartuko da aurkeztutako proiektuaren aurrekontu osoa, zeinak eskatutako proiektuan adierazitako jardueretara egokitua eta doitua egon behar duen. Zeharkako kostuak (administrazioa, kudeaketa, bulegoko materiala, telekomunikazioak, ura, gasa, elektrizitatea eta bestelako zerbitzuak, betiere, diru-laguntza eskatu den proiektuari argi eta garbi egozteko modukoak badira) ezin dira programako zuzeneko kostuaren % 20 baino gehiago izan. Proiektu batek ere ez du jasoko kapitulu honi dagokion diruaren % 7a baino gehiago.

2.– Ordainketa zatika egingo da: % 80a, diru-laguntza onartzean, eta gainerako % 20a, berriz, Osasun Sailaren Osasun Publikoaren eta Adikzioen Zuzendaritzari diru-laguntza justifikatzeko memoria bidali ondoren, jarduera bukatu eta bi hilabete igaro aurretik bidali ere. Diruz lagundutako proiektua balioetsi behar da memorian, zenbateraino bete den adierazi, eta garapenaren balorazio kualitatiboa egin.

3.– Justifikazioak osasun publikoaren eta adikzioen alorrean eskumena duen organoaren egoitza elektronikoan, euskadi.net-en, ageri den ereduaren arabera izango dira, eta dokumentazio osagarriarekin batera zuzendu beharko zaizkio Osasun Sailaren Osasun Publikoaren eta Adikzioen Zuzendaritzari.

Justifikazio-memoria horri «Jarraipen ekonomikoa» izeneko agiria erantsi behar zaio; hor egingo da gauzatutako aurrekontuaren laburpena eta justifikazio-kontua. Justifikazio-kontua erantzukizunpeko adierazpen bat da; hor agertu behar dira onartutako aurrekontu guztia, bai eta gastua

egiaztatzeko agiri guztien zerrenda ere, adieraziz zer dokumentu mota den, norena, nork edo zer erakundek eman duen, kontzeptua, data, zenbatekoa eta programari egozteko ehunekoa.

Diru-laguntza behar bezala aplikatu ote den egiaztatzeko, finantzatutako jardueraren gastuaren egiaztagiria, lagin adierazgarriaren oinarriaren gainean, laguntza eman eta ondorengo bost urte-tan egiaztatuko dira, Osasun eta Kontsumo Sailak, Kontrol Ekonomikorako Bulegoak edo Kontuen Euskal Epaitegiak egin behar dituen gainerako ikuskapenak, jarraipena eta kontrola alde batera utzi gabe.

Erakunde onuradunek emandako laguntzaren kontura egindako gastuak egiaztatzeko dokumentuak dagokion egunetik aurrera gutxienez bost urtez gorde eta eskura eduki beharko dituzte.

4.– Agiri horiek, atal guztiak behar bezala beteta dituztela, aurrez aurre aurkez daitezke Eusko Jaurlaritzaren Herritarrei Laguntzeko bulegoetan, Eusko Jaurlaritzaren ordezkarietan edo Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legeak 38.4. artikuluan aurreikusitako erakundeetan.

Era berean, bide elektronikoak ere erabili ahal izango dira justifikazioak aurkezteko. Informazioa eta prozedura eskura izango dira osasun publikoaren eta adikzioen arloan eskumena duen erakundeak euskadi.net-en duen egoitza elektronikoan, 3. artikuluan aurreikusitako izapidetze elektronikoaren jarraibideetan azaldutako prozeduraren eta jardueren arabera.

AZKEN XEDAPENETATIK LEHENENGOA.– Errekurtsoak.

Agindu honek administrazio-bidea amaitzen du. Beraz, agindu honen aurka, interesdunek aukerako berraztertze errekurtsoa aurkeztu ahal izango diote Osasuneko sailburuari, hilabeteke epean; edo, bestela, administrazioarekiko auzi-errekurtsoa aurkeztu ahal izango dute Euskal Autonomia Erkidegoko Auzitegi Nagusiko Administrazioarekiko Auzietako Salan, bi hilabeteke epean. Bi epe horiek kontatzen hasiko dira Agindu hau Euskal Herriko Agintaritzaren Aldizkarian argitaratu eta hurrengo egunean.

AZKEN XEDAPENETATIK BIGARRENA.– Ordezko araubidea.

Agindu honetan aurreikusi gabeko prozedura-alderdi guztietan, Herri Administrazioen Araubide Juridikoa eta Administrazio Prozedura Erkidea arautzen duen azaroaren 26ko 30/1992 Legea aplikatuko da.

AZKEN XEDAPENETATIK HIRUGARRENA.– Jarraibideak.

Osasun Sailaren Osasun Publikoaren eta Adikzioen Zuzendaritzari ahalmena ematen zaio agindu hau garatzeko eta betetzeko beharrezkoak diren instrukzioak emateko.

AZKEN XEDAPENETATIK LAUGARRENA.– Ondorioak.

Agindu hau Euskal Herriko Agintaritzaren Aldizkarian argitaratu, eta hurrengo egunean izango ditu ondorioak.

Vitoria-Gasteiz, 2014ko ekainaren 17a.

Osasuneko sailburua,
JON DARPÓN SIERRA.